

寶王三昧論

四明鄞江沙門妙葉集

- 一、念身不求無病，身無病則貪欲易生。
- 二、處世不求無難，世無難則驕奢必起。
- 三、究心不求無障，心無障則所學躓等。
- 四、立行不求無魔，行無魔則誓願不堅。
- 五、謀事不求易成，事易成則志存輕慢。
- 六、交情不求益吾，交益吾則虧損道義。
- 七、於人不求順適，人順適則心必自矜。
- 八、施德不求望報，德望報則意有所圖。
- 九、見利不求沾分，利沾分則癡心亦動。
- 十、被抑不求申明，抑申明則怨恨滋生。

是故聖人設化，以病苦爲良藥，以患難爲逍遙，以遮障爲解脫，以群魔爲法侶，以留難爲成就，以敵交爲資糧，以逆人爲園林，以布德爲棄屣，以疎(註)利爲富貴，以屈抑爲行門。如是居礙反通，求通反礙。是以如來於障礙中得菩提道，至若鴛崛摩羅之輩，提婆達多之徒，皆來作逆，而我佛悉與記莖，化令成佛，豈非彼逆乃吾之順也，彼壞乃我之成也。而今時世俗學道之人，若不先居於礙，則障礙至時不能排遣，使法王大寶由茲而失，可不惜哉，可不惜哉。

(註：同疏)